

O Filifiliga mo le Faavavau, Vaega 3



Ia iloa le upumoni e fesootai ma lou liuaina. O le mea moni e tatau ona e umia e oe lava ia lou liuaina. E leai se isi e mafai ona ia faia mo oe.

Ia, e mafai ona ou valaaulia outou ia mafaufau i ni nai fesili? E te fia manao e lagona le filemu e uiga i popolega ua lofituina ai oe i le taimi nei? E te fia manao ia iloa atili Iesu Keriso? E te fia manao e aoao i le auala e mafai ai e Lona mana paia ona faamalolo ou manua ma vaivaiga? E te fia manao e lagona le mana matagofie ma mālū o le Togiola a Iesu

Keriso o galue i lou olaga?

O le saili e tali nei fesili o le a manaomia ai se taumafaiga—se taumafaiga tele. Ou te augani atu ia te outou ia pulea lau molimau. Galue i ai. Pulea. Tausi i ai. Faafaiilele ina ia tuputupu ae. Fafaga i upumoni. 'Aua ne'i faaleagaina i filosofia sesē o alii ma tamaitai lē talitonu ona e tuufesili lea pe aisea ua vaivai ai lau molimau.

Punouai i tatalo faatauana ma lotomaulalalo i aso taitasi. Tausia lelei oe lava ia i afioga a perofeta anamua ma aso nei. Ole atu i le Alii e aoao oe i le auala e faalogo lelei ai ia te ia. Faaalu atili se taimi i totonu o le malumalu ma i galuega o talafaasolopito o aiga.

A o e faia lau molimau ma au faamuamua sili ona maua, vaavaai mo ni vavega e tutupu i lou olaga.

Afai e i ai ni au fesili—ma ou te faamoemoe e i ai—saili ni tali faatasi ma manaoga faatauana ia talitonu. Aoao mea uma e te mafaia e uiga i le talalelei ma ia mautinoa e te liliu atu i puna e faatumulia i upumoni mo le taitaiga. Ua tatou ola i le tispensionione pe a “leai se mea e taofia” [Mataupu Faavae ma Feagaiga 121:28]. O lea, o le a i ai le taimi o le a tali mai ai e le Alii a tatou fesili uma.

I le taimi nei, faatofu oe lava ia i le faatanoavai faamanuiaina o faaaliga ua tatou maua i o tatou tamatamailima. Ou te folafola atu o le faia o lona mea ole a faamalosi ai lau molimau, e tusa lava pe lei taliina nisi o au fesili. O au fesili faamaoni, e fesiligia i le faatuatua, o le a taitai atu ai e *le aunoa* i le faatuatua sili atu ma le iloa sili atu. . . .

A o e puleaina lau molimau ma faatupulaia, o le a avea oe ma se meafaigaluega sili ona malosi i aao o le Alii. O le a “musuia oe e se galuega sili atu” [Alema 43:45]—o le galuega a Iesu Keriso!

E leai se mea o tupu i lenei lalolagi e sili atu ona taua nai lo le faapotopotoina o Isaraelu *mo Ia*. Faailoa atu i lou Tama Faalelagi e te manao e fesoasoani. Ole atu ia te ia e faagalue oe i lenei galuega mamalu. Ona e me'i lea i tua ma maofa i mea e tutupu pe a e faamuamua le Atua i lou olaga.

A'u uo talavou pele, ou te alofa ia te outou. Ou te faafetai atu ia te outou. Ou te talitonu ia te outou. I le avea ai ma perofeta a le Alii, ou te faamanuia ia te outou ia iloa le upumoni po o ai oe ma ia faatau le upumoni e uiga i lou gafatia moni mamalu o i ai. Ou te faamanuia ia te outou ia pulea a outou molimau. Ma ou te faamanuia ia te outou ia i ai le manao ma le malosi e tausi ai a outou feagaiga.

A outou faia, ou te folafola atu o le a outou lagonaina le tuputupu a'e faaleagaga, saoloto mai le fefe, ma se talitonuga maumaututu e seāseā e mafaufauina i le taimi nei. O le a outou maua le malosi e maua ai se tosinaga lelei e sili atu i lou malosiaga faalenatura. Ma ou te folafola atu o le a matua sili ona faafiafiaina o outou lumanai nai lo se mea e mafai ona outou talitonu i ai i le taimi nei. (Russell M. Nelson, “Filifiliga mo le Faavavau” [faigalotu i le lalolagi atoa mo le autalavou matutua, 15 Me, 2022], broadcasts. ChurchofJesusChrist.org)